

四庫全書

集部

欽定四庫全書

藏春集卷四

元 劉秉忠 撰

七言絕句

遣懷

靜守窮廬事不侵
閒中一日抵千金
傍人自任多評論
此是寥休道者心

曉行

向曉春風暖更清殘星和月落孤城金烏飛上扶桑樹
先是東方一片明

中秋月

月宮丹桂影婆娑簾捲珠樓讌素娥縱有開元遺譜在
人間難覓紫雲歌

過界牆

地老天荒雪亦蒼車頭軋軋轉羊腸短衣蓬鬢沙陀路
一歲三番過界牆

有懷遂長老十一首

香火僧齋闕靜緣黃塵導路又三年
故人不似青山色
擡起頭來在眼前

小院桃花晝掩扉東風軟軟日遲遲
兩鄉莫恨關山隔
自是人生有別離

東園花柳照青春野客閒陪賞翫人
望見城南山色好
卻回騎馬入紅塵

掃地焚香應接餘翠雲盤結滿窮廬
閒人不解謀生事

翻過牀頭幾冊書

雨過幽庭長綠苔東風時為掃塵埃
無人曾見春來處
門外桃花只自開

河漢西流斗柄橫
爐烟飛動月華清
陽春不恨無人和
靜裏歌來只自聽

山疊崔嵬水渺茫
故人萬里未相忘
飄零更借天邊鴈
獨駕秋風不入行

孤城寒角噓南樓
黃葉關山過鴈秋
憶起滹沱相別處

一窻風雨夢西州

軒外天桃手自栽
卧看花落與花開
有人來問西來意
笑指蒼烟惹綠苔

堂上笙歌醉耳紅
牡丹香散一簾風
謝家鸚鵡金籠裏
笑殺池邊綠繼翁

半生鞍馬逐風塵
鏡裏流年白髮新
自是功名有歸處
等閒不肯逐閒人

讀遺山詩十首

劍氣從教犯斗牛百川橫放海難收九天直上無凝滯
更看銀河一派流

鶴揚清唳過華亭銀漢無聲轉玉繩夢斷一軒明月在
令人心似玉壺冰

編排一字有高卑就者功夫作者知自古文章貴辭達
蘇黃意不在新奇

公論元無擅否臧過情聲聞可承當杜詩韓筆難書字
不待人言自發揚

北里笙歌勸酒杯
南隣門巷冷如灰
秋風萬里方搖落
叫殺孤鴻春不回

青雲高興入冥搜
一字非工未肯休
直到雪消冰泮後
百川春水自東流

情發聲調節作文
溫柔敦厚見詩真
離騷九變能堪尚
屈宋前頭更有人

兩岸桃花夾醉鄉
春江渺渺月茫茫
諸仙詩思難籠罩
仰羨雲霄孤鳳凰

秋風夜雨布衣單破屋猶憂天下寒不料世人多莽鹵
久教吾道屬艱難

雲霞閃爍動霓旌轟磕征輦震地聲千里折衝歸指畫
將壇孫子獨論兵

三月

背陰花木錦成叢幽谷鶯啼上苑中李白桃紅楊柳綠
天涯無處不春風

續山谷焚香

險心萬仞畫冥冥躁欲紛紛動五兵誰會焚香黃魯直
出門一笑大江橫

癡坐

青春緣底忙忙去白髮無端續續生自笑行藏多錯料
卻將癡坐學忘情

淡中

瀟瀟洒洒水雲鄉擾擾膠膠名利場世味覺來真嚼蠟
澹中服過味如糖

夏夜

天星不見黑雲垂
一夜轟雷雨雪飛
睡起陰雲寒栗烈
夏衣猶自是冬衣

夢回

心上無塵世上仙
北軒高挂自由眠
正當午夢醒時節
竹裏碁聲到枕邊

春思

江梅零落玉枝空
草草花花上苑中
桃李不言春不管

綠情紅思滿東風

留燕

銜泥舊燕壘新巢來往如辭曲折勞蝸舍雖微足容爾
畫梁爭得幾多高

暮春

百花眼底亂飄零綠滿池塘草又生絕色海棠春也妬
況他風雨本無情

齋中

閒來長把自心平寸地人間萬事萌好惡自先欺不得
休論暗室有神明

為宋義甫言書三首

轉腕不圓焉解草立毫未正漫為真須因規矩忘規矩
才得縱橫似古人

書法晉人多得妙右軍筆陣獨縱橫鵝頭轉處無凝滯
一段風流老更成

張君筆法入神趣顛草翻藏古篆風枯樹晚鴉棲未遍

忽看雲海起羣鴻

感興九首

千羽無由息戰爭
讀書空有未忘情
條然獨坐穹廬裏
安得人心自太平

人間萬事不能周
自省無虧豈有憂
聞道春風和氣裏
大家都好展眉頭

殘星落盡東方明
夜氣消沈萬事生
誰信道人心似水
無時無節不澄清

敬防暴慢禮防身橫逆來加莫要嗔萬物分明脩於我
儻能克己自歸仁

河橫斗轉三更夜秋月亭亭影未斜一段光明如許大
等閒休遣亂雲遮

百年身世寄蘆盧萬事無心自破除一炷古香清靄裏
靜來重展案頭書

善無不顯惡難藏天網恢恢有弛張牙齒落殘舌尚在
誰知柔弱勝剛強

元精不逐物虛盈天地誰能踐此形萬物凋枯歲寒後
庭前松栢只青青

周流元氣不嘗停晝夜相推有晦明一屈一伸天地理
銀蟾西沒日東生

歸來

鞍馬生平談笑間歸來贏得鬢毛斑紅塵只在南窗外
收得身心一榻閒

春曉

海棠微露濕胭脂楊柳輕風弄碧絲一片春光都是恨
佳人睡起倚樓時

秋望

白沙汀渚近漁村蘋蓼花邊鷗鷺羣老鶴得秋猶勁健
九皋飛起入青雲

過田家

柳映長堤水浸沙夏初騎馬過田家鳴鳩喚住西山雨
桑葉如雲麥始花

春望

濛濛小雨浥芳塵一片花光眼底新
山色隔烟無忽有故教凝佇倚樓人

山洞桃花

山村路僻客來稀紅杏梢頭掛酒旗
洞裏桃花人不見春心春色只春知

新開牡丹

四月新來三月還一春光景鏡中看
東風也逐情濃處

吹落桃花放牡丹

雨過登樓

錦里春光曉望中雨餘花潤草蒙茸青山尚在浮烟裏
樓上分明見幾峰

宮中曲

簾捲東風戶半開閒庭烟鎖綠紋苔海棠花上黃昏月
曾照金鸞幾度來

馳車行

駝頂丁當響巨鈴萬重軋軋一齊鳴當年不離沙陀地
輾斷金原鼓笛聲

送寶先生因所借陶詩為贐

養老須開十頃地求凰應長九苞兒莫還兩冊淵明集
便當今朝送別詩

小溪

小溪流水碧如油終日忘機羨白鷗兩岸桃花春色裏
可能容個釣魚舟

憶遂通長老三首

年來癡坐百無為，絕體玄微卻自微。
此意塞鴻傳不到，黃爐青縷漫南飛。

去年抵枕過三冬，別後關河邈萬重。
桃李多花易零落，青青羨殺歲寒松。

一半佳山未見分，平生行止不堪云。
又逢明月當三五，滿眼清光似對君。

為大覺中言詩四首

水平忽有驚人浪蓋是因風擊起來造語若能知此意
不須特地騁奇才

七情六義一心中言語還因感處通李杜蘇黃無二律
後生徒苦立家風

清雄騷雅因題賦古律篇章逐變生一字莫教無下落
有情還似不能情

四時迭運方成歲萬物交參始是文須信乾坤常肅靜
龍吟虎嘯自風雲

晚眺

長歌短詠流年裏
遠眺登高夕照邊
不見南山真面目
一川秋水淡林烟

晴望

樓頭凝眺倚晴暉
山勢長林水附堤
燕子雙雙銜不遍
鳳凰城裏落花泥

期飲

天上日迴牛女度
人間春滿鳳凰城
謫仙不飲杯中醪

閒殺花前好月明

溪上

蘆花遠映釣舟行
漁笛時聞三兩聲
一陣西風吹雨散
夕陽還在水邊明

春睡

桃李爭開眼倦開
十分春睡若嬰孩
每於濃處嗔人喚
恐礙周公入夢來

訪處士不遇二首

山水分明圖畫展
烟霞散倒洞湖開
何須更見幽人面
覽此還家不漫來

漁舟散去釣綸收
一片殘陽在樹頭
誰與騷人消遠思
倚樓獨自看川流

山林

鐘鼎於人殊不惡
山林在我固當然
東風掃盡庭前雪
芳草青青又一年

年來

本存實志間終老卻被虛名誤
半生甚喜年來得書看
小齋清洒紙窗明

行中小憩

水邊下馬憩斯須從者相催急
又趨自笑不如灘上鳥
飛來飛去只由渠

寄中山乾明寺主

十年朔漠走風塵今日乾明伴
水雲長老周旋待賓客
僧中也有孟嘗君

寄長安友人

梧桐葉盡菊花殘，賴有青松保歲寒。
騷客題詩滿河朔，可無一句到長安。

詠海印居士幽居四首

東西院映千竿竹，南北池開萬朶蓮。
人在丹青圖畫上，不勞雲海覓神仙。

草枯不整登山屐，蓮盡空閒泛水舟。
旋撥瓮頭新熟酒，淵明醉倒菊花秋。

嚴冬無色物歸根凍柳枯荷各任真紅翠許多何處去
翁言今已屬藏春

春日鶯啼綠楊樹夏天人賞白蓮花請君試自南頭數
城市山林第一家

清明後一日過懷來

居庸春色限燕臺山杏凝寒花未開驛馬蕭蕭雲日晚
一川風雨過懷來

近詩

詩如雜劇要鋪陳遠自生疎近自新本欲出場無好絕
等閒章句笑翻人

魯連不受賞

魯連談笑卻三軍玉壁冰壺不受塵一葉扁舟滄海濶
千金留與市廛人

諸葛親細務

中持大體取英豪邊幅紛紛有六曹萬里經綸談笑了
區區蜀國豈須勞

卧龍廬

風雨南陽一草廬不知容得幾江湖
九層淵底驪龍睡任有人窺領下珠

赤壁故事

三分漢鼎勢全張未悟曹公獨渺茫
赤壁風濤千載後只教勲業屬周郎

讀洛神賦

八斗奇才筆力雄洛神一賦盡為功
當時羅襪生塵處

猶有波紋起細風

閒書

千里家山入寸眸
碧天無際月橫鉤
書成得得秋風夜
一線微鴻獨倚樓

春深

新染薔薇一撲黃
梨花亂舞白霓裳
憑誰收拾春風去
催發酴醾滿架香

馬上七夕二首

醉眠野鳥三呼起老雨西風一掃空馬上賦詩秋七夕
碧天無際思無窮

香盤綵帳蛛絲網歲歲年年七夕同何處巧成樓上女
玉鈎簾幕捲秋風

桃花曲

紅錦濯來一片新武林溪上照青春世間都唱桃花曲
誰是桃花洞裏人

桃花落

溪上天桃春已過，劉郎漸老奈花何。
狂風向晚休生惡，枝上殘紅苦不多。

海棠曲

翠斂紅粧色正新，精神占斷滿園春。
東風莫恠長耽睡，吹得醒來更誤人。

城西遊

昨朝信馬鳳城西，鞭約垂楊過小堤。
春色滿園花勝錦，黃鸝只揀好枝啼。

月宮謠

洞裏桃花不獨春
劉郎才去阮郎新
廣寒宮裏姮娥住
空惜娉婷不嫁人

紅葉流

霜落嚴秋錦樹空
瑣窗幽思滿西風
金河本是無情水
流出宮中一葉紅

倚樓吟

獨上高樓晚不歸
碧空望斷鴈猶飛
欄干十二無凭處

靜倚東軒待月輝

征西回

春回三月過西州芳草青青不斷頭
多少凍溪凝住水盡隨歸客向東流

詠關雎

佳人窈窕花難比才子溫和玉不如
紅日轉西家事緩碧紗窻下詠關雎

鳴鳩詞

春風吹翅樹頭鳴
呌散浮雲日色晴
呼婦歸來鵲巢裏
鳴鳩元不解謀生

遠別離

霜落江寒鴻鴈稀
倚樓人定怨歸遲
笛聲喚起山頭月
飛上青天照別離

睡蝴蝶

芳草連山翠萬重
天涯何處不春風
玉蝴蝶在深花裏
想與莊周夢不同

憶友

禁漏遲遲夜未分
對床清話不生塵
別來幾度西窗下
風雨瀟瀟憶故人

客館

客館蕭條動客情
飛螢箇箇傍窗明
樓頭鼓角風吹斷
漏下銀壺第一聲

春始來

三月南州草木長
落花飛絮滿池塘
東君也惜天涯客

盡放春光過界牆

禪頌十首

如來妙法離文字萬語千言何處歸
鹿苑祇園空浩浩
回頭四十九年非

頂圓肩坦腹中花老大維摩不出家
玉鏡金針休補綴
十方世界一袈裟

鏡中影像元非我石上精神卻是誰
落盡桃花春不管
枝頭青子自纍纍

衲子家風不外求何須苦鬪快龍舟許來大小如來藏
堅得俱低一指頭

見色明心方是暗聞聲悟道轉為遲斷頭船子無牽緒
自在滄浪東復西

驢頭馬面誰分別雕背魚腮孰忖量諱卻舊名人不識
長沙元是舊三郎

禪榻夢回三丈日香爐烟裊一絲風東家喃喃西家默
都在去來大藏中

倚棹乍離楊柳岸策筇又過杏花村水聲禽語相和應
說盡觀音不二門

春風展葉橋頭柳臘月開花水畔梅萬事隨緣真省力
何須心地冷如灰

朝雲暮月齋簷底春水秋山拄杖邊自任閒行與閒坐
年來忘盡祖師禪

古燕感懷

虎擲風拏感壯懷英雄遺恨化塵埃燕山依舊青如染

佇望黃金布隗臺

焚勝梅香

春風吹滅小檠缸
夢斷爐香結翠幢
簷外杏花橫素月
恰如梅影在西窗

薔薇

漫與東風作主人
栽培花草伴閒身
不辭接竹成高架
收拾薔薇一片春

洛川

洛川東邑幾時歸
漾漾清流照翠微
日暖雪消沙岸轉
鴛鴦相對不驚飛

宿寒山寺

樓上鳴鐘報五更
朦朧深殿佛燈明
更無幽夢隨寒枕
聽徹松風到岸聲

溪上

溪上映人楊柳黃
滿溪流水平
泱泱憑君莫向溪南望
春草春風能斷腸

素帳

山為屏帳草為茵車馬縱橫動塞塵過客遠看霜一點
豈知中有讀書人

亭帳

草色如波照碧空新開一朶玉芙蓉雄風吹斷襄王夢
高捲巫山十二峰

馬酮

青樓歌酒少年郎費盡千金笑一場玉釀飲來甘似醴

羨伊不肯使人強

聞笳

霜天月夜鴈南歸塞上誰將捲葉吹
莫逐西風聲斷續
天涯遠客不勝悲

鳳

來儀之日賀清朝一返丹山信息遙
倘使而今有歸意

關

小戎非是七香車

遠山

仙娥初試鏡中粧
左翠微濃右翠長
應是無人愛平淡
不須重問畫眉郎

秋月

夢回殘影來窻上
日落清光墮馬前
一片可將方鏡比

照來照去已三年

東勝道中

天荒地老物消磨贏得詩人感慨多
兩鬢黃塵秋色裏
又投東勝過黃河

讀易

人常與易不相離著意求言轉見疑
動靜既萌又象具
此情明得是著龜

學道

收心學道造精微急著工夫已是遲寡過誰如遽伯玉
回頭四十九年非

偶得

人之有善與誰行不善休忘教誨情責備百中無一二
聰明都是不聰明

夜雨

接地陰雲晚不開故鄉歸夢到邢臺枕邊忽聽雷聲起
風雨縱橫一發來

棋

棋盤十九路縱橫百著皆從一著生黑白自持心有亂
不如袖手看輸贏


寄溫子玉

聰明天賦不能求求得聰明一世愁留得三分不曉事
禪房深處咽饅頭

桃枝曲

一色桃花十里春劉郎見日尚精神東風吹入西家去

猶寄芳心憶故人



藏春集卷四

欽定四庫全書

集部

藏春集卷

五

詳校官中書_臣孫溶

主事_臣呂雲棟覆勘

總校官編修_臣

王燕緒

校對官中書_臣

高 中

謄錄監生_臣

施 華

欽定四庫全書

藏春集卷五

元 劉秉忠 撰

樂府

木蘭花慢

到閒人閒處更何必問窮通但遣興哦詩洗心觀易散步攜筇浮雲不堪攀慕看長空澹澹沒孤鴻今古漁樵話裏江山水墨圖中千年事業一朝空春夢曉聞鐘得

史筆標名雲臺畫像多少成功歸來富春山下笑狂奴
何事做三公塵事休隨夜雨扁舟好待秋風

二

既天生萬物自隨分有安排看驚驚雲霄驛騶道路斤
鷄蒿萊東君更相料理著春風吹處百花開戰馬頻投
北望賓鴻又自南來紫垣星月隔塵埃千載拆中台歎
麟出非時鳳歸何日草滿金臺江山閱人多矣計古來
英物總沈埋鏡裏不堪看鬢樽前且好開懷

三

笑平生生活計渺浮海一虛舟任紫塞風沙烏蠻瘴霧即
處林丘天地幾番朝暮問夕陽無語水東流白首王家
年少夢魂正繞揚州鳳城歌舞酒家樓肯管世間愁奈
麋鹿疎情烟霞痼疾難與同遊桃花為春憔悴念劉郎
雙鬢也成秋舊事十年夜雨不堪重到心頭

風流子

書帙省淹留人間事一笑不須愁紅日半窗夢隨胡蝶

碧雲千里歸驂驪酒杯裏功名渾瑣瑣今古兩悠悠
漢代典刑蕭曹畫一晉朝人物王謝風流冠蓋照神州
春風弄絲竹勝處追遊詩興筆搖牙管字字銀鈎遇美
景良辰尋芳上苑賞心樂事取醉南樓好在五湖烟浪
誰識歸舟

永遇樂

山谷家風蕭閒情味只君能識會友論文哦詩遣興此
樂誰消得室中天地目前今古今日還明日似南華蝶

夢醒來秋雨數聲殘
滴詩書有味功名應
小雲散碧空
幽寂北海洪鑄南山
佳氣清賞今猶昔一
天明月幾行
征鴈樓上有人橫笛
想醉中八表神遊不
勞鳳翼

望月婆羅門引

春眠正美覺來風雨滿江樓
捲簾情思悠悠望斷沙烟
渚蘋蓼不勝秋但冥冥天際
難識歸舟大夫骨朽算空
把汨羅投誰辨濁涇清渭一
任東流而今不醉苦一日
醒醒一日愁薄薄酒且放眉
頭

二

年來懶看古今文字紙千張酒中悟得天常閒殺堦前
好月不肯照西廂任昏昏一醉石枕藤牀名途利場物
與我兩相忘目斷霜天鴻鴈沙漠牛羊一庭秋草教粉
蝶黃蜂自任忙花老也尚有餘香

洞仙歌

倉陳五斗價重珠千斛陶令家貧苦無畜倦折腰閭里
棄印歸來門外柳春至無言綠山明水秀清勝宜茅屋

二頃田園一生足樂琴書雅意無箇事卧看北窗松竹
忽清風吹夢破鴻荒愛滿院秋香數叢黃菊

江城子

平生行止懶編排住蒿萊走塵埃社燕秋鴻年去復年
來看盡好花春睡穩紅與紫任他開紫微天上列三台
問英才幾沈埋滄海遺珠當著在鸞臺與世浮沈惟酒
可如有酒且開懷

二 遊瓊華島

瓊華昔日賀新成與蒼生樂升平西望長山東顧限滄
溟翠輦不來人換世天上月自虛盈樹分殘照水邊明
雨初晴氣還清醉卻興亡惟有酒多情收取晉人腮上
淚千載後幾新亭

三

松蒼竹翠歲寒天鴈山前鳳城邊回首燕南一別又三
年長愛故人心似月人不見月還圓小窻寂寂鎖凝烟
一燈然一詩聯詩苦燈青孤影伴無眠明日酒中餘思

在揮醉墨洒雲牋

三奠子

念我行藏有命烟水無涯嗟去鴈羨歸鴉半生人累影
一事鬢生華東山客西蜀道且還家壺中日月洞裏烟
霞春不老景長嘉功名眉上鎖富貴眼前花三杯酒一
覺睡一甌茶

玉樓春

閒雲不肯狂馳騁向晚自來樓岳頂野人無事也關門

一炷古香焚小鼎驚烏有恨無人省飛去飛來明月影
夜闌萬籟寂中聞破牖透風微覺冷

二

翠微掩映農家住水滿玉溪花滿樹青山隨我入門來
黃鳥背人穿竹去烟霞隔斷紅塵路試問功名知此趣
一壺春酒醉春風便是太平無事處

臨江仙

同是天涯流落客君還先到襄城雲南關險夢猶驚曾

記明月底高枕遠江聲
去年來人漸老不堪苦思功
名傾開懷抱酒多情幾時同
一醉揮手謝公卿

二

滿路紅塵飛不去
春風弄我華顛故園桃李酒樽前賞
心逢美景此事古難全
若智若癡人總笑夕陽空裊吟
鞭馬頭山色翠相連
不知山下客何日是歸年

三

堂上簫韶人不奏
鳳凰何處飛鳴黃塵擾擾馬縱橫
誰

能知樂毅志不在齊城後輩漫搜前輩錯到頭義重功
輕海隅四向盡蒼生東風吹綠草布谷勸春耕

四 梨花

冰雪飢膚香韻細月明獨倚闌干遊絲縈惹宿烟環東
風吹不散應為護輕寒素質不宜添彩色定知造物非
慳杏花才思入凋殘玉容春寂寞休向雨中看

五 桃花

一別仙源無覓處劉郎鬢欲成絲蘭昌千樹碧參差芳

心應好在時復問蜂兒報道洞門長閉著只今未有開
時杏花容冶沒人司東家深院宇牆外有橫枝

六

海棠

十日狂風才是定滿園桃李紛紛黃蜂粉蝶莫生嗔海
棠貪睡著留得一枝春便是徐熙相對染丹青不到天
真雨餘紅色愈精神夜眠清早起應有惜花人

小重山

詩酒休驚誤一生黃塵南北路幾功名枝頭烏鵲夢頻

驚西州月夜夜照人明枕上數寒更西風殘漏滴雨三
聲客中新感故園情音書斷天曉鴈孤鳴

二

雲去風來雨乍晴斷烟分遠樹夕陽明夕陽無處鴈斜
橫山重疊山外更入行千古短長亭別離渾是苦奈西
征欲憑雙鯉寄幽情東風水幾日到襄城

三

曉起清愁酒益空清愁緣底事別離中登臨無地與君

同青山色山外更重重落盡海棠紅
薔薇新破萼露華濃牡丹芳信一簾風
尋幽夢曾到小園東

四

漠北雲南路九千舊年鞍上馬又新年
玉梅寂寞老江邊東風輕楊柳得春先
斜月照吟鞭可人難似月缺還圓桃花
流水杏花天歡娛地誰鬪酒樽前

五

一片殘陽樹上明百禽爭噪噪雨初晴
西風鴻鴈落沙

汀歸舟遠漁笛兩三聲
烟草逐人行前山青未了後山
橫山川人物鬪崢嶸
黃塵路鞍馬笑平生

江月晃重山

芳草洲前道路夕陽樓上欄干碧雲何處望歸鞍從軍
客耽樂不思還洞裏仙人種玉江邊楚客滋蘭鴛鴦沙
暖鵲鵲寒菱花鏡不奈鬢毛班

二

杜宇聲中去住蝸牛角上輸贏金瓶名字儘人爭秋鴻

影湖水鏡般明楊柳烟凝露重蓮花月冷風清萬年枝
穩鵲休驚隣家笛夜夜故園情

三

太白詩成對酒仲宣賦就登樓思鄉懷古兩悠悠黃塵
路風雨鬢驚秋三島雲隨鶴馭五湖月載歸舟青山西
塞水東流功名好歡伯笑人愁

四

紅雨斜斜作陣綠雲碎碎成堆武陵溪口幾人迷桃花

水流入不流迴夏日薰風殿閣秋宵寶月樓臺仙凡境界隔塵埃青鸞客歸去又歸來

南鄉子

南北短長亭行路無情客有情年去年來鞍上馬何成短鬢垂垂雪幾莖孤舍一檠燈夜夜看書夜夜明窗外幾竿君子竹淒清時作西風散雨聲

二

翠袖捧離觴濟楚兒郎窈窕娘別曲一聲雙淚落悲涼

縱不關情也斷腸今古利名忙誰信長安道路長昔日
去家年正少還鄉故國驚嗟兩鬢霜

三

憔悴寄西州賦得登樓懶上樓魂夢不知關塞遠悠悠
疎雨梧桐客裏秋往事起新愁九曲回腸不自由見說
世間離別苦休休一夜相思白了頭

四

遊子繞天涯才離蠻烟烟塞沙歲歲年年寒食裏無家

尚惜飄零看落花
聞客卧烟霞
應笑勞生鬢
早華驚破石泉槐
火夢啼鴉
掃地焚香自煮茶

五

李杜放詩豪
萬丈晴虹吸海濤
六義不傳風雅變
離騷金玉無言價
自高春日對春醪
短詠長歌慰寂寥
幽鳥落來花裏語
從教彩鳳飄飄上九霄

六

季子解縱橫
六印累累拜上卿
鳳鳥不來人漸老
謀生

二頃田園也易成樽酒醉淵明菊有幽香竹有聲吹破
北窻千古夢風清古鳥喧啾噪曉晴

七

夜戶喜涼颼秋入關山暑氣消勾引客情緣底物鷓鴣
落日淒清叫樹梢古寺漏長宵一點青燈照寂寥暮雨
夜深猶未住芭蕉殘葉蕭疎不奈敲

八

檀板稱歌喉唱到消魂韻轉幽便覺絲簧難比似風流

一串驪珠不斷頭
惟酒可忘憂
况復盧家有
莫愁醉倒
不知天早晚
雲收花影侵
窻月滿樓

鷓鴣天

垂柳風邊拂萬絲
春光照眼惜花枝
鳳城好景誰來賞
忙殺悠悠世上兒
歌近耳酒盈卮
十分勸飲卻推辭
人生休聽漁家曲
一日風波十二時

二

酒酌花開對月明
醒中醉了醉中醒
無花無酒仍無月

愁殺耽詩杜少陵三品貴一時名衆人爭處不須爭流
行坎止何憂喜笑泣窮途阮步兵

三

花滿樽前酒滿卮不開笑口是癡兒山林鐘鼎都休問
且聽雙蛾合一詞春爛處夜晴時玉壺香雪冷胭脂海
棠影轉梧桐月吟到梨花第一枝

四

清夜哦詩對月明詩魂偏向月邊清欲成小夢還驚破

無奈洋河聒枕聲紅日曉碧天晴風沙撲面過雞鳴灤
陽川裏魚龍混四海青山拱一城

五

水滿清溪月滿樓客懷須賴酒消愁風迴玉宇三更夜
露滴金莖八月秋情脉脉思悠悠星河織女隔牽牛乘
槎欲把仙郎問也似浮生有白頭

六

柳映清溪漾玉流火榴開罷芰荷秋一聲漁笛烟波上

宜著蓑翁泛小舟紅蓼岸白蘋洲聞鷗聞鷺更優游斜
陽影裏山偏好獨倚闌干懶下樓

七

殘月低簷挂玉鉤東風簾幙思如秋夢魂不被楊花攪
池面還添翠靨稠紅叱撥翠驂騶青山隱隱水悠悠行
人更在青山外不許朝朝朝不上樓

太常引

長安三唱曉雞聲誰不被利名驚攬鏡照星星都老卻

當年後生山林蒼翠江湖烟景歸去沒人爭休望濯塵
纓幾時得滄浪水清

二

衲衣藤杖是吾緣好歸去舊林泉富貴任爭先總不較
諸公著鞭鴈飛汾陽鶴歸華表人事又千年滄海變桑
田誰知有壺中洞天

三

老山樵悴瑣寒雲站路上最傷神破帽鬢沾塵更誰是

陽關故人頽波世道浮雲交態一日一番新無地覓松筠看花草青紅鬪春

四

桃花流水鱖魚肥青筍笠綠蓑衣風雨不須歸著甚做人間是非兩肩雲袖一枝筇杖盡日總忘機之子欲何為快來去山猿怪遲

五
魯仲連

當時六國怯強秦使羣策日紛紛談笑卻三軍算自古

誰如此君一心忠義滿懷冰雪功就便抽身富貴若浮雲本是箇江湖散人

六 武侯

至人視有一如無見義處便相扶三顧出茅廬莫不是先生有圖極危當世覺民斯道佩玉已心枯遺恨失吞吳真箇是男兒丈夫

秦樓月

杯休側為君送別城南陌城南陌茸茸芳草萬家春色

陽關一曲愁腸結吟鞭斜裊黃昏月黃昏月長安古道
洛陽遊客

二

斜陽暮西風落葉關山路關山路歸鴻巢燕笑人來去
我歌一曲君聽取人生聚散如今古如今古湘江秋水
渭川春樹

三

調羹手殘枝莫折離亭柳離亭柳年年春盡為誰消瘦

海棠過雨愁紅皺
行人駐馬空搔首
空搔首秦樓花月
鳳城歌酒

踏莎行

白日無停青山有暮功名兩字將人誤
褊懷先著酒澆
開放心又被書收住一味閒情十分幽趣
夢哦芳草池塘句東風吹徹滿城花無人曾見春來處

二

碧水東流白雲西去旌旗捲盡西山雨
淡烟寒露月黃

昏傷懷又似別來處
雙眼增明青山如故
故人怪我來何暮
征鼙聲震五更風
夢魂驚散無蹤緒

訴衷情

山河縈帶九州橫
深谷幾為陵
千年萬年興廢花月落
陽城圖富貴論功名
我無能一壺春酒
數首新詩實訴衷情

謁金門

春寒薄睡起宿醒生
惡枕上家山都夢卻
東風吹月落

留客定知西閣有酒與誰同
酌別手臨岐曾記握君心
真可託

二

醪雖薄再四勸君無惡杯
到面前須飲卻鶯啼花未落
東置功名高閣兩日三朝
留酌綠柳來年無可握春愁
憑底託

好事近

桃李盡飄零風雨更休懷
惡細把牡丹遮護怕黃昏吹

落平蕪望斷更青山樓外數峰削野鳥不知歸處把行
雲隨著

二

酒醒夢回時小鼎串烟初滅留得瘦梅疎竹弄窻間風
月起來幽緒轉清幽幽處更難說一曲竹枝歌罷滿曾
懷冰雪

清平樂

月明風勁花弄牕間影一夜玉壺秋水冷梧葉乍凋金

井世間日月如梭人生會少離多籬畔黃花開盡相逢
不醉如何

二

夜來霜重簾外寒風動橫笛樓頭才一弄驚破綠窻幽
夢起來情緒如何開門月色猶多照我如常如舊更誰
能似姮娥

三

漁舟橫渡雲淡西山暮岸草汀花誰作主狼籍一江秋

雨隨身簫笠蓑衣斜風細雨休歸自任飛來飛去伴他
鷗鷺忘機

四

彩雲盤結何處歌聲噎歌罷彩雲歸絳闕棹下堦前明
月月華千古分明照人一似無情不道天涯離客夢回
愁對三更

卜算子

曉角纔初弄驚覺幽人夢珠壓花梢的的圓春露昨宵

重小鼎香浮動閒把新詩誦坐客同嘗碧月團擘破雙
飛鳳

浣溪沙

桃李無言一徑深客愁春恨莫相尋看花酌酒且開襟
白雪浩歌真快意朱絃未絕有知音月明千里故人心

朝中措

贈章仲一

衣冠零落暮春花飄捲滿天涯好把中原麟鳳網來祥
瑞皇家白雲丹嶂清泉綠樹幾換年華認取隨時達節

莫教繫定匏瓜

桃花曲

一川芳景一壺春酒一襟幽緒今朝好天色又無風無
雨水滿清溪花滿樹有閒鷗伴人來去行雲望逾遠更
青山無數

二

青山千里滄波千里白雲千里行程問行客更無窮山
水青史功名都半紙念劉郎鬢先如此桃源覓無路對

溪花紅紫

二

茸茸芳草漫漫長路忽忽行李佳人在何許眇雲山千
里莫惜千金沽一醉道劉郎不宜憔悴春歸寂寞語恨
桃花流水

點絳脣

十載風霜玉關紫塞都遊遍驛途方遠夜雨留孤館燈
火青熒莫把吳鉤看歌聲輒酒斟宜淺三盞清愁散

二

古寺蕭條十年再到經行路舊題新句總是關心處挂
起西軒轉覺添幽趣斜陽暮淡烟疎雨濕遍山前樹

三

客夢初驚雪晴風冷千山曉塞烟沙草又上郵亭道石
室蘿龕為我君應掃何時到放懷吟嘯相伴山間老

四

寂寂朱簾鳳樓人去簫聲住斷腸詩句彩筆無題處花

褪殘紅綠滿西城樹衡皋暮客愁何許梅子黃時雨

五

天上春來滿前芳草迷歸路楚山湘浦朝暮誰雲雨鳳
吹初聽認是吹簫侶劉郎去碧桃千樹世外無尋處

六
梨花

立盡黃昏鞭塵不到凌波處雪香凝樹懶作陽臺雨一
水相懸脉脉難為語情何許向人如訴寂寞臨江渚

七
梅

策杖尋芳小溪深雪前村路暗香時度更在清幽處一
見冰容便有西湖趣題新句句成梅許折得南枝去

八

恰破黃昏一彎新月梢梢共玉溪銀永時有香浮動別
後清風馥郁添多種如相送未忘珍重已入幽人夢

桃源憶故人

桃花亂落如紅雨閃下西城碧樹寂寞瑣窗朱戶最是
春深處一樽酒盡青山暮樓外輕雲猶度遠水悠悠不

住流得年光去

藏春集卷五

欽定四庫全書

藏春集卷六

元 商挺 編

附錄

拜光祿大夫太保參領中書省事制

長生天氣力裏皇帝聖旨咨爾劉秉忠氣剛以直學富而文雖晦迹於空門每潛心於聖道朕居藩邸卿實賓僚側聞高誼餘二十年出從遐方幾數萬里迨予嗣服

須汝計安不先正名何以壓衆宜從師位兼總政機可
特授光祿大夫太保參領中書省事卿其勉輔朕躬率
先乃屬察朝夕之勤惰審議論之是非凡有施為並聽
裁決佇觀成績別示寵章准此中統五年八月日

贈儀同三司太傅諡文貞制

長生天氣力裏大福蔭護助裏皇帝聖旨臣以忠孝而
事上貴輸獻納之誠上以禮義而遇臣思篤始終之愛
視死之日猶生之年故光祿大夫太保劉秉忠學窺天

人識貫今古遂冲而有守安靜而無華昔侍潛藩稔聞
高論適當三接之際懇上萬言之書蓋將舉天下而措
諸安以戒為人主者果於殺朕嗣服而伊始卿盡力以
居多蓋得卿寔契於朕心而獨朕悉知於卿意事皆有
驗人匪他求周旋三十年不避其難剴切數百奏各中
其理共成庶政方圖任於舊人誰謂旻天不憖遺於一
老興言及此何日忘之載惟台輔之尊厥有泉局之賁
是用錫之綸命峻一品之華階祿以袞衣躡三槐之正

位復加顯號允答殊勲惟爾英靈識予哀寵可贈儀同
三司太傅諡文真准此至元十二年正月日

行狀

故光祿大夫太保贈太傅儀同三司諡文真劉
公行狀資政大夫中書左丞張文謙奉勅撰

公諱侃更名秉忠字仲晦自號曰藏春其先仕遼為當
時大族世居瑞州之劉李村一門之內居顯列者甚眾
金初公之曾祖襲世業累遷邢州節度副使丁母憂乃

還瑞州留一子於邢名澤即公之祖也因而家焉為人
倜儻有大志鄉里甚畏重之娶邢臺張氏女生一子名
潤即公之父也通音律慈祥長者與物無忤庚辰歲天
兵南下太師國王經略河朔邢遂舉以降留官鎮守以
草昧之際聽便宜行事遂立都元帥府衆推潤為副都
統尋陞都統事定之後署本郡錄事為政寬簡不立威
嚴凡民有鬪訟者既伏其罪則必以善言教戒而遣之
終不忍鞭扑也時西山諸堡寨未附寇盜充斥錄事公

時或暮夜醉歸雖兇惡輩必相與扶送至家而去累任
鉅鹿內丘提領又以寬仁得衆心年甫六旬村居不仕
生二子長即太保公也次曰秉恕公生而秀異丰骨不
凡在嬉戲中便為羣兒所推長或舉之為帥或拜之為
師居然受之不疑隨即教令揮斥之性剛而有斷非理
不屈於人母馬氏嚴整有法度凡起居飲食必責公以
正理不為姑息之愛八歲入學誦書為諸生稱首年十
三以父為錄事為質於元帥府元帥一見即云此兒骨

格非常他日必貴命僚佐教之文藝不使列質子班置之幕司公遂立志為學詩文字書與日俱進同輩生莫得窺其涯際也年十七節使趙公引置幕下甚愛重之時方在貧乏中一介不以取諸人好賢樂善而居常裕如也丙申歲丁母憂毀瘠骨立疏食水飲哀思無窮恒衣一綿裘晝夜不解帶者三年見之者無不感歎也戊戌春遂決意逃避世事遜居於武安之清化遷滴水澗苦形骸甘澹泊宅心物外與全真道者居復欲西遊關

陝天寧虛照老師聞之愛其才而不能舍遣弟子輩詣清化就為披剃與之俱來秋七月大蝗居人之乏食者十八九虛照老因妹婿之請就熟雲中挈公同往己亥秋虛照老還邢公因留住南堂講習天文陰陽三式諸書會海雲大士至一見竒其才時上在藩邸遣使召海雲老北上因攜公偕行既至見公洒落不凡及通陰陽天文之書甚喜海雲老南歸公遂見留自是禮遇漸隆因其顧問之際遂闢用人之路暇中則讀書窮易講明

聖人學丙午冬其父錄事公之哀聞至上聞之召入溫
言慰諭丁未春賻以黃金百兩遣使送還六月至邢州
依通禮行素志冬十月葬祖父母及父母于邢臺之賈
村戊申冬十二月上遣使召公已酉春至王府庚戌夏
上萬言策所陳數十餘條皆尊主庇民之事首言正朝
廷振紀綱選相任賢安民固本執牘以奏上皆嘉納之
甲寅秋上征雲南以神武不殺之心所向克捷算無遺
策其所全活者不可勝數公夙夜勤勞以副上意未嘗

少怠已未秋六軍渡江公潛贊神機孜孜匪懈一如雲南之行庚申春上正位宸極召公命之曰凡天下大經養民之良法卿其議擬以奏公即上採祖宗舊典參以古制之宜於今者條列以聞深稱上意詔下之日綱舉目張一時人材咸見錄用文物粲然一新先是上命有司擇上都南山之勝地營建庵舍而居公焉公號其山曰南屏中統五年秋八月改元至元翰林學士承旨王鶚奏公當正衣冠且曰鶚嘗勸焉亦嘗見許乞賜特

旨以遂衆望詔從之以光祿大夫太保參領中書省事
更名秉忠公既大拜報國之心益切上命公議建國號
定都邑頒章服舉朝儀事無巨細有關時政之得失者
公知無不言七年庚午上從諸臣之請遣禮部侍郎趙
秉溫禮擇翰林侍講學士竇默之次女以配公竇氏賢
而有文御下以寬車駕歲時行幸兩都公必隨之十一
年夏齋戒沐浴於南屏之靜舍秋八月壬戌夜謂侍者
我欲靜坐不召勿來侍者皆退長歌至鷄鳴乃止遲明

侍者入御端坐而薨如假寐然顏色累日不變識者知公坐脫也享年五十有九猶子蘭璋嗣焉上遣禮部侍郎知侍儀司事兼祕書少監趙秉溫擇以冬十月壬申葬于大都之西南凡所營葬之資一出於內帑十二年春正月詔贈太傅儀同三司文真公帝曰朕惟秉忠始終逾三十年隨行跋涉雖祁寒暑雨未嘗有倦意而又言無隱避一皆出於忠誠其天文卜筮之精朕未嘗求於他人也此朕之所自知人皆莫得與聞今其亡也了

無遺恨特命學士王磐撰碑銘公博學無方明通而溥
其勲業之著見於世昭昭然不可掩也論藝業則字畫
出魯公筆法草書二王三昧發邵氏皇極之奧旨改前
代已差之厯法得琴阮徽外之遺音至天文卜筮算數
皆有成書無一不極其至詩章樂府又皆膾炙人口公
之弟秉恕累任禮部侍郎順德安撫使彰德懷孟淄萊
順天路總管其母張氏賦性勤儉篤於謹嚴公平生之
嘉言善行播在天下者甚多姑錄已之所知者以道出

處之大槩云至元乙亥春正月張文謙拭淚書

神道碑銘

故光祿大夫太保贈太傅儀同三司文真劉公
神道碑銘并序翰林學士嘉議大夫知制誥兼
修國史王磐奉勅撰昭文館大學士正議大夫
姚樞奉勅書國信使所參議官高翽篆額

耕莘非求進之地而伊尹阿衡釣渭非巧宦之途而太
公同載漢張良志從赤松而高祖得之以輔成帝業唐

李泌幼好仙術而肅宗用之以佐定中興蓋天下之士
惟自重者可與有為而輕進者必非令器是以古之明
王取士不以悅媚易親者為可佳而以閒遠高潔難致
者為可貴聖天子之用太保劉公其審是道歟公以高
潔之資慕空寂之教輕富貴如浮雲等功名於夢幻局
嘗有一毫榮利之念動於心乎聖天子邂逅一見即挽
而留之待以心腹契如魚水深謀密畫雖耆宿貴近不
得與聞者悉與公參決焉此其精誠胥會志意交孚與

夫渭濱之同載商邑之阿衡蓋異世而同符矣公諱秉忠字仲晦瑞州劉李村人先世仕遼多顯貴金初曾大父嘗任邢州節度副使秩滿身還鄉里留其家於邢故自公大父以下遂為邢人焉大父諱澤資性倜儻為鄉閭所重父諱潤仕本朝歷邢州錄事鉅鹿內丘兩縣提領俱有惠愛公風骨秀異志氣英爽不羈家貧年十七為邢臺節使府令史以養其親幹敏條潔諸老吏咸服其能一日因案牘事有不愜意者投筆嘆曰吾家奕世

衣冠今吾乃汨沒為刀筆吏乎丈夫不得志於世間當
求出世間事耳即棄去隱於武安山岩谷間草衣木食
以求所志天寧寺虛照禪師聞之遣其徒招致與披剃
為僧仍以公知經書工翰墨命掌書記後遊雲中住南
堂寺值海雲禪師被召北覲過雲中聞公博學多藝能
求相見既見約公俱行公不可海雲固要之不得已遂
行既至謁今上於潛邸一見應對稱旨自是屢承顧問
及海雲南還公遂見留居數年錄事公卒訃音至公懇

求奔喪上賜之黃金百兩仍遣使送邢州公持服營葬
事起墳於賈村葬其祖父母父母服闋被召復還和林
公獻書陳時事所宜者數十條凡萬餘言率皆尊主庇
民之事上嘉納之甲寅歲從上征雲南己未歲從上伐
宋由楊羅渡濟江圍鄂州上神武英斷每臨戰陣前無
堅敵而中心仁愛公常贊之以天地好生為德佛氏以
慈悲濟物為心方便救護所全活者不可勝計庚申歲
春上正位宸極創定朝儀立官制改元建號一切所當

施設時物之宜皆公所草定中統五年秋八月改至元
元年翰林學士承旨王鶚奏言書記劉秉忠效忠藩邸
積有歲年參幃幄之密謀定社稷之大計忠勤勞績宜
被褒崇今聖明御極萬物惟新秉忠猶以野服散號蕭
條間寂守其初心深所未安宜與正其衣冠崇以顯秩
實遂衆望上覽奏欣然嘉納即日命有司備禮冊授公
光祿大夫位太保參領中書事選聘侍講學士竇默次
女為夫人賜第於奉先坊給少府宮籍監戶人口甚衆

公齋居疏食終日澹然與平昔略不少異至元十一年
扈從至上都居南屏之精舍秋八月壬戌之夜儼然端
坐無疾而薨享年五十有九訃聞上嗟悼不已謂羣臣
曰秉忠事朕三十餘年小心慎密不避險難事有可否
言無隱情又其陰陽術數占事知來若合符契惟朕知
之他人莫得與聞也遣禮部侍郎趙秉溫護其喪還大
都以冬十月壬申葬大都西南二十里崇福鄉之原棺
歛營葬一切所須皆出內帑十二年春正月詔贈太傅

儀同三司下太常議謚曰文真仍命翰林學士王磐定
謨碑石文字臣磐欽惟國家列聖相承咸以武功戡定
禍亂龍韜豹略鷹揚虎視豐功偉績之臣其當紀名汗
簡畫像凌烟者不為不多若夫輔佐聖天子開文明之
治立太平之基光守成之業者實惟太傅劉公為稱首
聖天子方在潛邸士之所以涉遠道冒風霜而至者往
往有所陳訴祈請干慕進用惟公獨無所求閒燕之歸
每承顧問輒推薦南州人物可備器使者宜見錄用由

是弓旌之所招蒲輪之所迓者儒碩德奇才異能之士
茅拔茹連至無虛月逮今三十年間揚歷朝省班布郡
縣贊維新之化成治安之功者皆公平昔推薦之餘也
其識度之宏遠推此一節而論亦可見其髣髴矣又自
幼好學至老不衰通曉音律精算數善推步仰觀占候
六壬遁甲易經象數邵氏皇極之書靡不周知初丁太
夫人憂毀瘠骨立衣一弊裘三歲不易及錄事公卒雖
身從天竺之教而服食貶損容貌衰戚與循禮典而執

通喪者蓋無少異也晚娶無子以猶子蘭璋為嗣弟秉
恕今為順天路總管臣磐謹按中書左丞張文謙所作
行狀次第其行事實而系以銘辭銘曰

大元五葉聖運隆昌爰有異人出佐時康不坐官府不
趨朝行褐衣疏食禪寂徜徉謀謨帷幄罄竭忠良指陳
成敗開闔陰陽淵慮規畫鬼神莫量扶日上天照臨萬
方萬方仰德百靈效祥庭陳玉帛路走梯航朝儀整肅
濟濟蹒蹒羣賢未集庶政允藏大綱一舉衆目畢張治

定功成聖眷彌彰崇資峻秩師表侯王肇造皇家元勲
是當良平佐漢房杜興唐公不自多愈隆謙光見善必
舉有能必揚陸行滯阻與為橋梁川濟艱危與為帆槳
寒而求衣燠之裘裳饑而求食飫之腴肪門庭桃李爛
漫芬芳人感公德銘刻肝腸公施於人過即遺忘公之
仁賢宜享遐年胡為一朝蟬蛻而仙燕都南原盧溝北
喚佳城鬱鬱有墳歸然地錮重泉松栢參天石爛松枯
芳名永全

墓誌銘

故光祿大夫太保劉公墓誌銘翰林侍講學士
少中大夫知制誥同修國史徒單公履撰

公姓劉氏諱侃更名秉忠仲晦其字也號曰藏春世居
瑞州之劉李村其先仕遼多貴顯經亂譜牒散亡不能
考據獨公之曾祖金初以世族累遷邢州節度副使秩
滿愛其風土因而家焉繼丁母憂還瑞州留一子二女
長適邢臺李氏次適陳氏子名澤即公之祖父也為人

倘有志節鄉里多愛重之娶張氏生男名潤公之父也幼通音律性慈祥居家接物之際終日無忤色號稱長者庚辰歲天兵南下邢遂舉郡降太師國王喜之聽立都元帥府衆推公為副都統尋陞都統事稍定改署本郡錄事為政寬而不苛民有爭訟者必以理諭之人皆服其忠恕相讓而罷蓋庶幾古之不忍欺者時草昧之際未有定制州長數易無常每易則各樹親黨以代其先至者公獨不為所忌累任鉅鹿內丘提領所至皆

有遺愛年甫六旬以老得告二子曰秉忠即公也次曰
秉恕公天資穎悟卓犖不凡兒時與羣兒戲皆推以為
長發蹤指使莫不奔走服事無有違者識者竒之母馬
氏治家有法簡而不嚴教子踵三遷之訓尤不為姑息
鄉人稱賢焉公八歲入學日誦數百言甫十三為質於
元帥府元帥一見謂同僚曰此兒甚貴他日不可量也
命師教以文藝不使隸質子班公遂致力於學道藝文
章同輩莫能及年十七節使趙公以為才引置幕下丙

申歲丁母憂毀瘠骨立恒衣一綿裘晝夜不解帶三年
人以為難能公優為之可謂盡子道矣戊戌春公忽有
所感謂人曰人生有限世事寧有極耶吾其息乎乃遁
居武安之清化作文數篇以寓意又遷滴水澗雖疏食
飲水裕如也天寧虛照老師聞之奇其行高而節苦遣
弟子顏仲復輩以禮諭公遂備弟子禮是歲秋大蝗師
遂挈公就熟雲中己亥歲大熟師乃還邢公因留住南
堂講習天文陰陽三式諸書時海雲大士赴上召一見

即攜公偕行既至上以公博學多能遂留之自是禮日
隆暇中讀四書窮易道講明聖人心學之妙無不該貫
丙午冬其父錄事公卒哀聞至公乞奔喪上許之贈以
黃金百兩既至邢依通禮服斬衰不以出世故而虧世
法也父子之倫正矣明年冬十月葬祖及父於邢臺之
賈村禮也戊申十二月上遣使召公還乃上策萬餘言
正朝廷振紀綱選相任賢安民固本若是者數十條上
曰誠如汝言天下可不勞而治公曰臣所言不敢不忠

在聖上從之與否耳既而復言於上曰今天下困弊刑為尤甚郡數乞官以治儻從其請刑民受賜多矣上遣本朝宿望之臣同劉肅才卿李簡子敬行專以存恤為務舊刑之版籍戶不過二十月餘流民歸者二萬刑遂大治甲寅秋從上征雲南首以神武不殺為請以故所全活者甚衆公決機制勝多與上合雲南之平此固廟謨英識算無遺策亦公贊成之力也已未秋六軍渡江以雲南之所請者復於上民皆壺箪以迎莫不有後

來蘇之望以全聖上好生惡殺之德者類如此庚申春
上正位宸極命公議立中書省分一路宣撫司內而藩
邸舊臣外而草茅遺逸皆得進用故官無曠員時無滯
才於是除煩苛定官制頒俸秩輕徭薄賦制禮作樂聲
明文物粲然一新號稱盛時焉五年八月改中統為至
元詔公以光祿大夫進位太保參領中書省事更今名
公既大拜以天下之重為已任以身徇國知無不為奏
建國號定都邑頒章服立朝儀事無巨細有關於國家

大體者枚舉而縷陳之無有遺者十一年夏齋居於上都南屏之靜舍秋八月壬戌夜謂侍者曰汝輩皆退不召且勿來也長歌至鷄鳴乃止遲明侍者入見其端坐不動即之乃瞑目輟息始知其已薨矣莫不大駭蓋其平日洗心無累故其歸也安所以長歌者其猶古之所謂翫世者乎享年五十有九猶子蘭璋為嗣上遣禮部郎知侍儀司事兼秘書少監趙秉溫擇以十月晦日葬於大都西南之崇福原凡所營葬之資一出於特恩也

弟秉恕累任禮部侍郎順德安撫使彰德懷孟淄萊順
天路總管皆著能聲其母張氏性勤儉內助謹嚴視公
猶所生公之夫人竇氏乃今翰林侍講學士竇默之女
七年庚午詔遣禮部侍郎趙秉溫禮擇而配者焉夫人
賢而且文御僕妾有恩內外宜之公之勲勞卓然著於
世者固不可掩也論藝業字畫楷書雖多惟以魯公筆
法為正草書又獨取二王以為專門之學餘則不暇論
也其用心之正可見矣探邵氏皇極之奧旨正前代積

差之歷法得琴阮徽外之遺音繫乎天文星緯卜筮算
數皆有成書詩章樂府又皆膾炙人口其多能又如此
至於嘉言正論達之於啓沃之際者未能盡錄俟後之
紀于神道云銘曰繫公之初稟元精氣奪玄化生而靈
始從大覺正法乘萬緣一掃鴻毛輕超然遠引拋塵纓
成已成物乃自成聖哲有訓垂丁寧晨門荷蓀真狂生
絕世而往恐未能歸來讀書志益凝旁達技數搜玄冥
學通而晦寧與徵政可絜世躋昇平天開地闢旭日升聲

教溥洽昭皇明提封所暨窮四溟面內不啻葵心傾公
時佐命居保衡斟酌時措恢邦經天官上宰董六卿百
師庶尹咸師承一時憲度明章程叔孫綿莚鏘珮珎宮
懸九奏何鏗鉤曠時隆典今儀刑鋪張若是誰倚憑拔
擢俊秀推髦英于飛振鷺來充庭謀主斷國禪益弘事
在宸慮人無稱功成不居寧智名天聰一日音訃聆尚
冀假寐聊遐征神遊不返慘聖情始終寵賻全哀榮天
不憖遺一鑑零九原可作瞻模形麒麟有像傳丹青燕

山西來盧水縈墳科馬鬣幽泉扁岸深為谷谷乃陵榮
公不朽存吾銘

祭文

維至元十一年九月甲戌朔八月辛巳昭文館大學士
姚樞致祭于太保劉公亡友之靈嗚呼昔在恒山我車
于憩公來惠然始交一臂王邸再逢始見淵懿六籍四
書潛心內嗜釋子之衣孔門之嗣吾道斯文綱維不墜
格君之心匪政匪事引君之道曰仁曰義國其丘民惟

賢乃入兵則神武不殺為至輯集一書累踰萬字陳於
王前若合符契試政邢臺翕爾成治陝右河南化行尤
亟雲南逆命邦人罔累漢鄂折衝兵無暴肆萬國懽心
咸薦之帝帝曰俞哉其來所自元勲不居孤卿無位身
入靜深學窮幽邃歷數之原元曾運世所以盈虛矢口
坐致積養有素時行未既俄聞訃音脫然蟬蛻不疾而
終誠足以異斯焉取斯係乎尚志莫不我偕身親目視
及物功多鬼神報施過此以還未知所謂天皇歸賻母

后土瘞諸相庶官半由門庇感兮孔悲潛焉出涕人世
哀榮鮮克有儷六十之年不為蚤逝後莫大焉猶子以
繼遺恨毫釐衆所弗置諸生在門一語不遺嗚呼哀哉
我思或存公往如棄魂其來兮以承禴祭尚亨

又

維至元十一年歲次甲戌冬十二月望日翰林侍講學
士吏部尚書博州路總管徐世隆謹以清酌庶羞之奠
致祭于太保劉公之靈嗚呼天興大元六十餘年王氣

所鍾有開必先聖不獨出衆賢從之聖賢相逢千載一
時岩岩劉公首出襄國學際天人道冠儒釋初冠章甫
潛心孔氏又學保真復參臨濟其藏無盡其境無涯鑿
開三室混為一家逆知天命早識龍顏情好日密話必
夜闌如魚得水如虎在山易地諸葛彌天道安道人其
形宰相其心誰其似之黑衣惠琳數精皇極禍福能決
誰其似之邵君康節詩詠高逸方外神遊誰其似之碧
雲湯休字畫清勁筆中法具誰其似之黃山文孺扈從

王師柔服哀牢公於是時蜀之韋皋堂上出奇鄂江飛渡公於是時晉之杜預天王既尊山人自晦公於是時唐之李泌相宅卜宮兩都並雄公於是時周之召公中統建元宣撫十道多舉名儒視草其詔至元入省命贊萬幾暫決大議力辭以歸上亦知公不屑細務止解中書仍居保傳官制未定圖具列之朝儀未肅公奏聞之方期弘化儀刑萬方天遽奪之今也則亡生平少疾遲明歌唱開戶視之掩書長往天子震悼朝臣涕洟下至

行路靡不哀思國事有疑誰與稽之民歲有災誰與禳
之僚友有咎誰與救之人之老誠寧復見之曩過趙郡
有三夫士曰蕭曰劉器量包世迹混佛老心同禮周仁
雨義風欲洒九州蕭已仙蛻獨遺藏春栽培桃李徧滿
君門身為師賓門多卿相榮被殊遇得獲大葬公旣無
憾我獨何悲第愧老謬嘗辱公知我愛文辭許我典故
視事翰林持衡文部公非私舉我豈懷恩言念如舊往
哭其墳南州孺子生芻一束奠章寫心老淚盈掬嗚呼

哀哉尚饗



藏春集卷六